

procedebat versus Aquilonem, faciebatque fossam civitatis juxta longitudinem ejus usque ad plagam Aquilonis: & super eam erat intrinsecus rupes eminens, quam Josephus *Arram* appellat, quæ sustinebat murum civitatis superpositum, cingentem ab Occidente civitatem usque ad *portam Ephraim*, ubi curvatur contra Orientem, usque ad *portam Anguli*, quæ in angulo civitatis constituta erat, contra angulum Aquilonis & Orientis: & ibi rursus curvabatur ab Aquilone per Orientem contra Austrum extra aream templi, includens illam & domum regis atque portam fontis sive aquarum juxta montem Sion. Et iste totius civitatis erat ambitus. *Rupes* autem illa, super quam ex parte Occidentis erat exstructus murus civitatis, erat valde eminens, præsertim in angulo, ubi Occidentalis muri pars connectebatur Aquilonari, ubi & turris, *Neblosa* dicta, erecta erat, & propugnaculum valde firmum, cujus ruinæ adhuc visuntur, unde tota Arabia, Jordanis, mare Mortuum, & alia plurima loca sereno cælo videri possunt. Ab hac rupe ex parte Occidentis declivis pendebat civitas nunc paulatim sese inclinans & rursus sensim erigens usque ad murum Orientalem, qui erat super torrentem Cedron, ubi civitas ipsa contigebat littus fluminis, habens illic portam, quæ dicebatur *porta Sterquilini*, eo quod per eam sordes civitatis defluebant in memoratum torrentem. Extra vallem, quæ est à parte Occidentis, fuit dominus crucifixus: & post passionem suam vorago illa fuit terra repleta, & longo post tempore civitas *muro* alio fuit cincta à turri David usque ad portam Ephraim, quæ nunc *Beati Stephani* nominatur. Ab Occidente verò rupes illa, quæ erat pars montis Gion, qui in altum contra Occidentem surgebat, supereminēbat urbi, sicque tota civitas ab istis duobus montibus quasi in declivi pendebat. *Mons Moria*, in quo *Templum Domini* & *palatium regis* Mons Moria. ædificata erant, aliquantulum altior erat civitate, sed per Romanos complanatus fuit mons ille, & missus in torrentem Cedron cum omnibus ruinis templi & atriorum, id quod hodiè aperte videri potest. *Area* autem *Templi* quadrata est, habens in longitudine & latitudine jactum arcus, & aliquid plus spatii, & Templum in ea nunc ædificatum *adheret* *ferè muro* civitatis, quum vetus templum longè ab eo distitum fuerit, quippe quatuor atriis interpositis, nec modo distat à muro torrentis Cedron ultra triginta pedes. Ab area templi contra Aquilonem, quantus scilicet est jactus lapidis, est *porta vallis*, quæ ducit in vallem Josaphat: & hæc etiam vocatur *porta gregis*, quod per eam introducebantur greges immolandi in templum: Proinde intrantibus portam vallis seu gregis, ad sinistram occurrit *Piscina probatica*, in qua Nathinnæi lavabant hostias, quas tradebant sacerdotibus in templo offerendas, & hæc *duas porticus* habuisse ostenditur, in quibus secundum Johannem jacebant infirmi, aquæ motum expectantes, Joh. v. 2, 3. Ad dextram verò ostenditur alia *piscina grandis*, quæ dicebatur *piscina interior*, tacta ab Ezechia: nam obturans superiorem fontem aquarum Gion, avertit aquas ejus, direxitque versus Occidentem urbis David, incidens ferro per vallem, quam paulò superius commemoravimus, introduxit aquas per medium civitatis in piscinam istam, ne populus in obsidione positus aquæ penuria laboraret: fontem verò aquarum Gion, qui non longè distabat ab agro fullonis, duxit in *superiorem piscinam*, quæ est super natatoria Silohæ. Et hæc quidem Achaz incepit, sed non perfecit. De hac piscina & hoc fonte atque ejus situ loquitur Isaias. *Egredere ad extremum aquæ ductus piscine superioris in via agri fullonis*, Jes. vii. 3. Dicitur autem *piscina superior* respectu *natatorie Silohæ*, quæ tanquam *inferior* recipit aquas de fonte Silohæ. Et ne erres in his piscinis, adverte quod *prima* & præcipua piscina in Jerusalem erat *piscina probatica*, duas habens porticus, quam Salomon fecit pro ministerio templi. *Secunda* fuit juxta illam contra Aquilonem, dicta *interior*, quam fecit Ezechias, ut dictum est. *Tertia* natatoria Silohæ, quæ erat sub monte Oliveti, & sub monte Sion, prope agrum *Hakeldemach*, habebatque aquam de fonte Silohæ, quam Ezechias quoque fecit. *Quarta* erat *superior piscina*, de qua dictum est, quam Ezechias etiam fecit. Et hæc non fuit in civitate, ut quidam sentire videntur, cum civitas ipsa altior fuerit origine ejus, de qua hæc piscina suas hauriebat aquas, nempe de fonte Silohæ, & de fonte inferiori aquarum Gion. *Vallis Josaphat* cingebat civi-